

TE PARE TIAIRAA

E FAAITE RA I TE FAATERERAA ARII A IEHOVA



Ua mauruuru anei oe i te
Ô RAHI ROA'‘E A TE ATUA?



EAHA TO OE MANA’O?

Eaha te ô faahiahia roa ’e ta te Atua i pûpû mai? Te na ô ra te *Bibilia*: “*I aroha mai te Atua i to te ao, e ua tae roa i te horoa mai i ta ’na Tamaiti fanau tahi.*”—Ioane 3:16.

Te faaite ra teie vea *Te Pare Tiairaa* no te aha te Atua i tono ai ia Iesu i te fenua nei no te pohe no tatou e e nafea ia faaite i te mauruuru no tera ô.

UA MAURURU ANEI OE I TE Ô RAHI ROA ’E A TE ATUA?

- 3 Te hoê ô tei ore i faito i te tahi atu
- 4 O te ô rahi roa ’e a te Atua te mea faufaa mau
- 6 Eaha ia ta oe e rave?

OIA ATOA

8 E TITAUHIA ANEI I TE TIAAU KERISETIANO EIAHA IA FAAIPOIPO?

10 TE TITAUHIA I TE TIAMÂRAA I TAHITO E I TEIE TAU

13 TE MAU MAITAI IA HOROA NOA

16 EAHA TA TE BIBILIA E PARAU RA?




E hinaaro anei oe e ite atu â aore ra te hoê haapiiraa *Bibilia* tamoni ore?

A hi’o i nia www.jw.org/ty aore ra a hapono mai i ta oe parau aniraa.

TAHITI (POLYNESIE FRANÇAISE):
Association Les Témoins de Jéhovah
BP 7715
98719 Taravao

NOUVELLE-CALÉDONIE:
Association Les Témoins de Jéhovah
BP 1741
98874 Pont des Français

No te ite i te tahi atu mau vahi nohoraa, a hi’o i nia www.jw.org/ty/papai-e-niuniu-mai.



Mea taa ê te huru e faatupu ai te mau Ite no lehova i te Amuraa maa a te Fatu i to te tahi atu mau haapaoraa: no te aha?

(A pata i nia [NO NIA IA MATOU > UIRAA A TE TAATA](#))



Vol. 138, No 4 2017

TAHITIAN

Neneiraa o te numera taitahi: 61 651 000
Na roto 297 REO

E ere teie papai i te mea hoo. E tuhaa te reira no te hoê ohipa haapiiraa *Bibilia* na te ao atoa nei e turuhia ra e te mau ô horoa noa.

No te mau ô horoa noa, a hi’o i nia www.jw.org/ty.

Aita ana’e i faahitihia te huriraa *Bibilia*, no roto mai ia te mau irava i *Te Bibilia Mo’a ra* ma te tahi mau faatanoraa i te tapao o te toparaa reo.

TE FAAHANAHANA ra te vea *Te Pare Tiairaa* i te Atua ra o lehova, te Arii o te ao taatoa. E tamahanahana atoa i te taata na roto i te parau apî oaoa fatata te Faatereraa arii a te Atua i te ra’i i te faaore i te ino atoa e te faariro i te fenua ei paradaiso. E faaitoito atoa te reira ia faatupu i te faaroo ia Iesu Mesia tei pohe ia nehenehe tatou e fana’o i te ora mure ore. Te faatere nei oia ei Arii o te Faatereraa arii a te Atua. Mai 1879 mai te pia-raahia teie vea e e ere i te papai poritita. O te mana’o o te *Bibilia* tei haafaufaahia i roto.

The Watchtower (ISSN 0043-1087) Issue 4 March 2017 is published monthly with an additional issue published in January, March, May, July, September, and November by Watchtower Bible and Tract Society of New York, Inc.; L. Weaver, Jr., President; G. F. Simonis, Secretary-Treasurer; 1000 Red Mills Road, Walkkill, NY 12589-3299. © 2016 Watch Tower Bible and Tract Society of Pennsylvania. Printed in Japan.



TUMU PARAU MATAMUA

Te hoê ô tei ore i faito i te tahi atu

IA HI'OHIA, e mea faufaa ore te tao'a e horoahia ra i roto i te rima o Jordan. Tera râ te tahi ô faufaa roa 'e no 'na. Te faataa ra Jordan: "Ua horo mai Russell, te tahi hoa paari o to matou utuafare, i te reira i to 'u tamariiraa." I muri a'e i te pohe o Russell, ua faaitehia ia Jordan, e hoa piri roa oia o tei tamahanahana i to 'na na metua e to 'na papa ruu i roto i te fifi. Te na ô ra Jordan: "I to 'u iteraa i te reira, ua haafau roa 'tu â vau i teie tao'a iti o tei horoahia mai."

Mai i roto i te tupuraa o Jordan, e nehenehe te tahi tao'a iti e riro ei mea faufaa ore no te taata. Area no tei fana'o i te reira, e mea tao'a rahi ia. Te faataa ra te Bibilia i te ô faufaa roa 'e na roto i teie mau parau: "I aroha mai te Atua i to te ao, e ua tae roa i te horo mai i ta 'na Tamaiti fanau tahi, ia ore ia pohe te faaroo ia

'na ra, ia roaa râ te ora mure ore."—Ioane 3:16.

Te feia o te fana'o i tera ô, e noaa ia ratou te ora mure ore! Te vai ra anei te tahi ô o tei faito i tera? No vetahi, e ere paha tera ô i te mea faufaa roa, area no te mau Kerisetiano mau, oia ia. (Salamo 49:8; Petero 1, 1:18, 19) No te aha râ te Atua i horo 'i i te ora o ta 'na Tamaiti i to te ao?

Teie te faataaraa a te aposetolo Paulo: "No te taata hoê ra i ô mai ai te ino i te ao nei, e no te ino hoi te pohe; e ua taea-atoa-hia te taata atoa e te pohe." (Roma 5:12) Noa 'tu ua ite te taata matamua ra o Adamu i te utua e topa i nia ia 'na, ua faaroo ore oia i te Atua. Eaha tei itehia i muri a'e? Ua naeahia to 'na huaai, te taata atoa ia, i te utua o te pohe.

No te faatiamâ i te taata i te utua o te pohe, ua tono te Atua i ta 'na Tamaiti o Iesu Mesia i nia i

te fenua no te horoa i to 'na ora tia roa no te ao. No reira te Bibilia e na ô ai: "E utua te pohe no te hara, area te ora mure ore ra, e mea horoa-noahia mai ia e te Atua i roto i to tatou ra Fatu ia Iesu Mesia." (Roma 6:23) Maoti tera hoo, te tusia taraehara ia, e fana'o te feia atoa o te faatupu i te faaroo ia Iesu i te ora mure ore.—Ephesia 1:7.

Na roto ia Iesu Mesia, e fana'o te feia e haamori i te Atua i te mau haamaitairaa rahi. No reira Paulo i na ô ai: "Ia haamaitaihia te Atua i to 'na ra horoa eita e tia ia parau." (Korinetia 2, 9:15)

No te faahiahia o te tusia taraehara, eita e tia ia faataa i te faufaa rahi o te reira. No te aha o te hoo te ô faufaa roa 'e o ta te Atua i horoa noa i te taata? Eaha te tumu i taa ê roa 'i te reira i te tahi atu mau ô no ô mai i te Atua? E nafea ia faaite i to tatou mauruuru? A hi'o na i te pahonoraa a te Bibilia i tera mau uiraa i roto i na tuhaa e piti i mua 'tu.

* Noa 'tu o Iesu tei "horoa i to 'na iho ora no tatou," **na te Atua** i faanaho i tera tusia no te faatupu i ta 'Na opuaraa. (Ioane 1, 3:16) Mea tano ia ia parau o te Atua te tumu o tera ô. E faaite te mau tuhaa i mua 'tu i te faufaaraa o te reira.

O te ô rahi roa 'e a te Atua te mea faufaa mau

Eaha te tumu e riro ai te hoê ô ei mea faufaa no oe? E feruri paha oe i na mana'o e maha: **Na vai** i horoa 'tu i te ô, **na te aha i turai** ia 'na ia horoa, eaha **tei titauhia ia 'na ia rave** e e **hinaaro mau** anei oe i te reira. Mea maitai atoa ia feruri i te reira ia mauruuru mau tatou i te hoo, te ô rahi roa 'e no ô mai i te Atua.



NA VAI I HOROA 'TU I TE Ô?

Mea faufaa paha no tatou te ô a te tahi taata tiarraa teitei aore ra faaturahia e tatou. Hoê â huru mai te peu na te tahi mero utuafare here aore ra hoa piri i horoa mai, noa 'tu e ere te reira i te mea moni

roa. Tera tei itehia no te ô ta Russell i horoa na Jordan, faahitihia i roto i te tuhaa na mua 'tu. E nafea te reira e tano atoa 'i no te hoo?

A tahi, te parau ra te Bibilia "**o te Atua** [te]ji tonono mai i ta 'na Tamaiti fanau tahi i te ao nei, ia ora tatou ia 'na." (Ioane 1, 4:9) Te vai ra anei o tei teitei a'e i te Atua? Teie ta te tahi papai Salamo

i pahono: "Ia ite te taata atoa e, o Iehova to oe i'oa, e o oe ana'e tei Teitei i te fenua atoa nei." (Salamo 83:18) E ô faufaa roa ia tera, e ere anei?

Te piti, e "metua" te Atua no tatou. (Isaia 63:16) Eaha te tumu? No te mea na 'na i horoa mai i te ora. Mai te metua tane i nia i ta 'na tamarii, aita atoa te Atua i faaea i te aupuru ia tatou. Teie ta 'na i ani i te tahi mau taata o to 'na nunaa i tahito ra ta 'na i pii Epheraima: "O tau tamaiti here anei Epheraima? e tamaiti hinaaro-rahi-hia anei oia? . . . ua horuhoru tau aau ia 'na: e aroha 'tu â vau ia 'na." (Jeremia 31:20) Mai tera atoa te huru o te Atua i nia i ta 'na mau tavini i teie mahana. E ere oia i te Atua poiete ana'e, e Metua e e Hoa atoa râ no tatou. E ere anei te ô no ô mai ia 'na i te mea faufaa roa?



NATE AHA I TURAI IA HOROA I TE Ô?

Mea faufaa roa atoa te tahi ô no te mea e horoahia te reira ma te aau tae, e ere rā mea faahepohia. Na te here ana'e i turai i te taata ia na reira, eita oia e titau ia faaho'ihia aore ra ia horoa-atoa-hia te tahi ô na 'na.

No to 'na here i horoa 'i te Atua i ta 'na Tamaiti no tatou. Te na ô ra te Bibilia: “Ua itea to te Atua **aroha** [aore ra here] ia tatou nei, o te Atua i tono mai i ta 'na Tamaiti fanau tahi.” Eaha te tumu? “Ia ora tatou ia 'na.” (Ioane 1, 4:9) Mea faahepohia anei te Atua ia na reira? Aita roa 'tu! Ua riro te hoo o tei aufauhia na roto ia Iesu Mesia ei faaiteraa o **te hamani maitai rahi o te Atua.**—Ephesia 1:7.

No te aha tatou e parau ai mai tera? Te faataa ra te Bibilia: “Ua faarahi rā te Atua i to 'na aroha ia tatou nei, i te mea te vai taata hara noa nei â tatou, i pohe ai te Mesia no tatou nei.” (Roma 5:8) Na te here i turai i te Atua ia tauturu i te taata hara, paruparu e te ravea ore. Eita e au ia tatou te here o te Atua e eita atoa hoi ta tatou e nehenehe e faaho'i atu ia au i ta 'na i horoa mai. Ta 'na ia ô te haapuraa rahi roa 'e o te here.



EAHA TE HAAPAERAA O TEI RAVEHIA?

Mea faufaa roa atoa te ô a te taata o tei rave i te haapaeraa rahi. Ia farii te tahi i te vaiiho i te hoê faufaa rahi e te horoa mai i te reira na tatou, eita anei tera ô e riro ei mea faufaa roa no tatou?

Ua horoa te Atua i **“ta 'na Tamaiti fanau tahi.”** (Ioane 3:16) O 'na ta te Atua i here roa 'e! Ua poi-etehia o Iesu na mua 'e te mau mea atoa. I vai na oia e te Atua ehia miria matahiti te maoro, mea

piri roa ia raua i te tahi e te tahi. Te parau ra te Bibilia o Iesu “ta 'na Tamaiti here ra” e “o te huru [aore ra hoho'a] mau oia o te Atua hi'o-ore-hia.” —Kolosa 1:13-15.

Aita ia te Atua i “faaherehere i ta 'na iho Tamaiti.” (Roma 8:32) Ua horoa mai o Iehova i tei riro ei mea faufaa roa 'e no 'na. Tera te haapaeraa rahi roa 'e o tei ravehia a'enei!



AITA A TATOU E RAVEA!

Mea faufaa roa atoa te ô mai te peu ua hinaaro mau tatou i te reira e no te mea atoa tera ana'e te ravea. A feruri na e ua ma'i-hia oe e e hinaaro oe i te tahi rapaauraa taa maitai o te ore e pee ia oe ia aufau. Eita ana'e oe e fana'o i te reira, e pohe oe. Eaha to oe huru ia haere mai te tahi taata e aufau i tera rapaauraa? Eaha rā paha oe i te mauruuru ia 'na, e riro ta 'na ô ei mea faufaa mau no oe!

“Mai te taata i hope i te pohe ia Adamu, e **hope atoa [te taata atoa] i te faorahia i te Mesia.**” (Korinetia 1, 15:22) Ei huaai na Adamu, te “pohe” nei tatou paatoa. Aita a tatou hororaa i mua i te ma'i e te pohe, eita atoa e tia ia tatou ia faahau e o te Atua e ia riro ei taata hapa ore i to 'na aro. Ei taata tia ore e te haihai, eita e tia ia tatou ia faaora ia tatou iho aore ra i te tahi atu taata. Te faaite maitai ra te Bibilia: “E ore roa e tia i te taata ia faaora i tana taeae, e aita a 'na hoo ia hopoi i te Atua e noaa mai ai oia ra . . . e ore roa 'tu ia e taeae.” (Salamo 49:7, 8) Aita a tatou e ravea! E hinaaro mau tatou i te tauturu, eita hoi e pee ia tatou ia aufau i te hoo no te faatiamâ ia tatou.

No to 'na here rahi, ua farii o Iehova i te aufau i te hoo ta te taata i hinaaro mau no te faatiamâ ia ratou. Mea na roto ia Iesu te taata atoa e faorahia 'i. Eaha te mau maitai ta tatou e ite maoti te hoo? E “mâ . . . ta tatou mau hara atoa i te toto o ta 'na

Tamaiti, o Iesu.” Ma te faatupu i te faaroo i te tusia o Iesu, e nehenehe ta tatou mau hara e faaorehia e e fana’o tatou i te ora mure ore. (Ioane 1, 1:7; 5:13) E faufaahia anei te feia pohe i te hoo? E, “mai te pohe hoi i noaa i te taata [hoê] ra, no te taata atoa [o Iesu] e noaa’i te tia faahou i te feia i pohe.” —Korinetia 1, 15:21.*

No to ’na here rahi, o tei teitei roa ’’e tei hora mai i te ô, te ora o Iesu tei pûpûhia ei tusia. O te Atua ra o Iehova tei rave i te haapaeraa rahi roa ’’e no te hora i tera ô. Hau atu â, ua hinaaro-mau-hia tera tusia no te faatiamâ ia tatou i te hara e te pohe. Aita ’tu ô o tei faito i te hoo ta te Atua i hora mai!

* No te ite atu â eaha ta te Atua e rave no te faatia mai i te feia pohe, a hi’o i te pene 7 o te buka *Eaha ta te Bibilia e haapii mau ra?* piahia e te mau Ite no Iehova. Te vai atoa ra i nia www.jw.org/ty.



No te ite atu â no nia i te tusia o Iesu e e nafea oe ia faufaahia i te reira, a mataitai i te video poto *A haamana’o i te mahana poheraa o Iesu* i nia www.jw.org/ty. A pata i nia [PIAHIA > VIDEO](#). Aore ra, a faaohipa i teie hoho’a.



Eaha ia ta oe e rave?

“Te riro nei hoi matou i te aroha o te Mesia ra, . . . i pohe hoi oia no te taata atoa, ia ore te feia e ora ra ia haapao faahou ia ratou iho i te oraraa nei, ia haapao râ ia ’na, tei pohe . . . no ratou.”—Korinetia 2, 5:14, 15.

E TIA ia faaite i te mauruuru ia horoahia mai te tahi ô faahia mau. Ta Iesu ia i hinaaro e haapii i muri a’e oia a faaora’i ahuru taata o tei roohia i te hoê ma’i haaparuparu, aore e ravea rapaauraa. I rotopu ia ratou, hoê ana’e tei “ho’i maira ma te pii hua i te haamaitairaa i te Atua.” Ua ani atura Iesu: “E ere anei tino ahuru atoa i tamâhia nei? teihea iho nei râ e tooiva?” (Luka 17:12-17) Eaha te haapiiraa e huti mai? E mo’e oiio ia tatou ta vetahi ê i rave no tatou!

E ere te hoo mai te tahi atu mau ô. Tera hoi te ô rahi roa ’’e o tei horoahia. Eaha ia te tia ia rave no ta te Atua i hora no tatou?


A haapii no nia i tei hora i te ô. Eita e navai ia hora i te hoo ia fana’o te taata atoa i te ora mure ore. Ua faaite Iesu i roto i ta ’na pure i te Atua eaha te tia ia rave: “Teie hoi te ora mure ore, ia **ite** ratou ia oe i te Atua mau ra, e ia Iesu i te Mesia i ta oe i tonono mai.” (Ioane 17:3) Ia parauhia ’tu ua faaora te tahi taata ia oe i te tamariiraa, eita anei oe e hinaaro e ite atu â no nia ia ’na e te tumu o ’na i faaora’i ia oe? O te Atua ra o Iehova tei hora i te ô o te faaora i te taata. Te hinaaro ra oia ia haapii oe o vai o ’na e ia riro oe ei hoa no ’na. No reira te Bibilia e faaitoito ai ia “haafatata ’tu i te Atua, e na ’na e haafatata mai.”—Iakobo 4:8.

A faatupu i te faaroo i te hoo. Te na ô ra te Bibilia i roto i te Ioane 3:36: “O tei faaroo i te Tamaiti ra e ora mure ore to ’na.” Na te aha e faaite e faaroo to te tahi taata i te hoo? Na ta ’na mau ohipa. (Iakobo 2:17) No te fana’o i te ô i faaineinehia na oe, e navai anei ia hi’o aore ra ia ite noa oe i te reira? Eita, e titauhia ia rave mai aore ra ia farii i te reira. Eita atoa e navai ia ite ua pohe Iesu no te hoo mai ia tatou, e titau-atoa-hia râ ia mauruuru i te reira. Eaha ia te tia ia oe ia rave? A haapii eaha ta te Atua e titau ra e i muri iho, a haa ia au i te reira.* A pure i te Atua ia faaore i ta oe mau hara ia faaea oe i te faahapa ia oe. A haafatata i te Atua ma te tiaturi papu e fana’o te feia

* Aita ’tu ravea maitai roa ’e no te ite o vai te Atua e no te riro ei hoo no ’na maori râ te haapiiraa i ta ’na Parau, te Bibilia. No te fana’o i te reira, a ani i te tahi Ite no Iehova aore ra a haere i nia i ta matou reni Internet jw.org/ty.

atoa o te faatupu i te faaroo i te hoo i te mau haamaitairaa mure ore: Te hoê oraraa hau, peapeape ore e te oaoa a muri a’e!—Hebera 11:1.

A haere i te Oroa haamana’oraa i te pohe o Iesu. Tera te oroa tamatahiti ta Iesu i haamau ia haamana’o tatou i te hoo i horoahia. Ua na ô oia: “E na reira outou ei mana’oraa ia ’u.” (Luka 22:19) E faatupu te mau Ite no Iehova i tera haamana’oraa i te pohe o Iesu i te **Mahana piti 11 no Eperera 2017** i muri a’e i te toparaa mahana. E faataa te oreroraa parau eaha te fauafaraa o te pohe o Iesu e eaha te mau maitai ta tatou e fana’o i teie nei e a muri a’e. I te matahiti i mairi, fatata 20 mirioni taata na te ao tei tae i tera Oroa haamana’oraa. Te titau manihini atu nei matou ia oe ia amui mai e o matou no te faaite i te mauruuru i te ô rahi roa ’e no ô mai i te Atua. ■



E titauhia anei i te tiaau Kerisetiano eiaha ia faaipoipo?

I ROTO i te mau haapaoraa na te ao, mai te ekalesia Katolika no Roma, e rave rau pūpū o te ekalesia Kerisetiano no hitia o te rā, te feia e pee ra ia Boudha e te vai atu ā, e titauhia eiaha ia faaipoipo no te riro ei aratai faaroo. No te taata e rave rahi rā, tera te tumu o te mau peu faufau o te itehia i rotopu i te mau tia haapaoraa.

Mea tano ĩa ia ui, e titauhia anei ia faaea taa noa no te tavini ei tiaau i roto i te amuiraa? Eaha ta te Bibilia e haapii ra? No te pahono, e hi’o ana’e mea nafea tera haapiiraa i te haamataraa e te parareraa. Oti ana’e, e hi’opoa tatou i te mana’o o te Atua.

TE ORARAA TAA NOA I ROTO I TE HAAPAORAA

Eaha te oraraa taa noa? Ia au i te tahi buka, “o te oraraa ma te ore e faaipoipo, e te oraraa atoa ĩa e taoto i te apiti. (*Encyclopædia Britannica*) E pinepine, tera te itehia no te feia e amo i te tahi tiaraa

i roto i te haapaoraa aore ra tei faataa ia ratou no te Atua.” I roto i ta ’na poroi i te pūpū taata i roto i te apooraa no Roma i 2006, ua parau te pāpa Benoît ua riro te titauraa eiaha ia faaipoipo ei “haapiiraa no te tahi tau piri atu i te tau o te mau aporetolo.”

Aita roa ’tu rā te mau Kerisetiano o te senekele matamua i faairi i te oraraa taa noa ei titauraa no te tavini i te Atua. Ua faaara te aporetolo Paulo, tei ora i te senekele matamua, e haaparare vetahi taata i te mau parau haavare e te haapiiraa o “te faaore [aore ra opani] hoi i te faaipoiporaa.”—Timoeteo 1, 4:1-3.

I te roaraa o te senekele piti, ua haamata tera peu i te rahi mai i roto i te mau haapaoraa Kerisetiano no tooa o te rā. Ia au i te buka *Oraraa taa noa e peu tumu a te haapaoraa* (Beretane), ua parare roa tera peu no te mea “ua farii a’ena te rahiraa i te

Ua faaora Iesu i te ma’i o te metua vahine hoovai o Petero.—Mataio 8:14, 15; Mareko 1:29-31



mau vahi faaterehia e te hau Roma i te haapae i te taoto i te apiti.”

Eaha tei itehia i te mau senekele i muri a’e no nia i tera titauraa eiaha te feia toroa o te haapaoraa ia faaipoipo? Ua tamau to te mau apooraa a te ekalesia Katolika e tei piihia te pūpū o te mau orometua i te turu i te reira. No ratou, e viivii te taata i te taotora i te apiti e eita e tano ia ’na ia amo i te hopoia a te mau aratai haapaoraa. Te faaite ra râ te tahi buka, “e rave rahi â perepitero e epikopo i te senekele ahuru e vahine ta ratou.”—*Encyclopædia Britannica*.

I te apooraa Latran tei tupu i Roma i 1123 e 1139, ua riro te titauraa eiaha ia faaipoipo ei faaheporaa no te amo i te hopoia. Aita te reira i tau i roto i te ekalesia Katolika no Roma e tae roa mai i teie mahana. Na mua ’e, e tutuu na te mau perepitero faaipoipohia i te faufaa a te ekalesia i ta ratou tamarii. Na roto râ i te faanahoraa i ravehia i na apooraa, ua faaea te faufaa rahi a te ekalesia i te mahere i te taata ê.

TE MANA’O O TE ATUA

Ua faaite-maitai-hia te mana’o o te Atua i roto i ta ’na Parau, te Bibilia. Ua faahiti Iesu i te feia o tei maiti i te oraraa taa noa mai ia ’na “no te basileia o te ao.” (Mataio 19:12) Ua faahiti atoa te aposetolo Paulo i te mau Kerisetiano o tei faaoti i te pee i to ’na hi’oraa ma te faaea taa noa “no te evanelia.”—Korinetia 1, 7:37, 38; 9:23.

Aita râ Iesu e Paulo i faaue i te mau tavini o te Atua eiaha ia faaipoipo. Ua parau Iesu e ere pauroa ta ’na mau pīpī te nehenehe e farii i te oraraa taa noa. E ô hoi te reira, e mea “horoahia” mai. I to Paulo papairaa no nia i te feia o tei ore i faaipoipo a’enei, aore ra te paretenia, ua parau tia roa ’tu oia: “Aita a ’u parau no ô i te Fatu ra; e tuu atu râ vau i to ’u mana’o.”—Mataio 19:11; Korinetia 1, 7:25.

Hau atu â, te faaite ra te Bibilia e rave rahi Kerisetiano faaipoipo o tei amo i te hopoia tiaau i te senekele matamua mai te aposetolo Petero. (Mataio 8:14; Mareko 1:29-31; Korinetia 1, 9:5) Ua faaipoipo ana’e te tiaau, ua papai Paulo, “ei taata vahine hoê” oia e te tia ia tapea i “ta ’na tamarii i te aua-

ro-maite-raa ia ’na.” Ua na reira Paulo i te parau no te rahi o te mau peu taotora tia ore i Roma.—Timoteo 1, 3:2, 4.

E ere teie mau Kerisetiano i te feia o tei faaipoipo e te ore e taoto i ta ratou vahine. Aita hoi te Bibilia i huna i te parau ia “horoa te tane i te mea tia i te vahine.” I te feia faaipoipo, ua na ô atoa: “Eiaha orua e faataa [aore ra faaere] ia orua iho” no te haamâha i te mau hinaaro o te tahi e te tahi. (Korinetia 1, 7:3-5) Mea papu, aita te Atua e titau ra i te taata ia faaea taa noa. E ere atoa i te mea tano ia faahepohia te tiaau Kerisetiano eiaha ia faaipoipo.

NO TE EVANELIA

Mai te peu aita i faahepohia, no te aha Iesu e Paulo i parau ai e mea maitai ia faaea taa noa? No te mea, e nehenehe tei farii i te reira e poro atu â i te parau apī oaoa. E taime rahi atu â to te feia taa noa, eita hoi ratou e tapitapi no te mau mea e haapeapea ra i te feia faaipoipo.—Korinetia 1, 7:32-35.

A hi’o na ia David o tei faarue i ta ’na ohipa au-fau-maitai-hia i Mexico no te haere i Costa Rica no te haapii i te Bibilia i te taata. No David, ua tauturu te oraraa taa noa ia ’na ia na reira. Te na ô ra oia: “E ere i te mea ohie ia haamatau i te peu tumu ê e te huru oraraa apī. Auaa e Kerisetiano faaea taa noa vau, mea ohie a’e iā.”

“Mea faaipoipohia oe aore ra aita, te mea faufaa, o te horoaraa i te mea maitai roa ’e i te Atua ra o Iehova. I reira hoi oe e oaoa ’i.”—*Claudia*

Ua haere atoa Claudia, te hoê vahine Kerisetiano taa noa, i te mau vahi e hinaarohia te feia poro evanelia. Te na ô ra oia: “Ua oaoa roa vau i ta ’u taviniraa. Ua puai atu â to ’u faaroo e ua piri atu â vau i te Atua. Ua taa mau vau na ’na i aupuru maite ia ’u.”

Eiaha te oraraa taa noa ia riro ei mea teimaha. Ua parau â Claudia: “Mea faaipoipohia oe aore ra aita, te mea faufaa, o te horoaraa i te mea maitai roa ’e i te Atua ra o Iehova. I reira hoi oe e oaoa ’i.”—Salamo 119:1, 2. ■



Te mau tītī i Aiphiti i tahito ra



E imiraa moni hoona mau te hooraa i te tītī i te mau fenua Afirika e Marite no apatoerau e apatoa

Te titauraa i te tiamâraa i tahito e i teie tau

Ua parauhia ia Nalia*, e noaa ta 'na ohipa ei taata tâpû rouru ia tae o 'na i Europa. Ua hamani-ino-hia râ oia ahuru mahana te maoro e ua haavîhia to 'na utuafare o tei faaea i to ratou fenua tumu. I te pae hopea, ua faahepohia o 'na ia taiata ia 'na.

Ua titauhia ia noaa ia Nalia hau atu 23 000 moni farane i te po hoê no te aufau i te moni faaauphia e to 'na vahine faatere o tei hau atu i te maha mirioni. Te faataa ra Nalia: "E pinepine au i te mana'o e horo ê, te mâtâ'u ra râ vau i ta ratou e rave i to 'u utuafare. Aita ta 'u e ravea." Hoê â atoa tupuraa o na maha mirioni taata na te ao o tei faatitihia ia taiata.

Fatata 4 000 matahiti i teie nei, ua hoohia Iosepha e to 'na mau taeae, e taurearea noa â oia i tera taime. Ua riro mai oia ei tītī i te fare o te tahi taata rahi i Aiphiti. Aita râ Iosepha i hamani-ino-hia i te

* Ua tauihia te i'oa.

haamataraa mai ia Nalia. Mai te taime râ a ore ai o 'na e farii i te taoto i te vahine a to 'na fatu, ua parihavare-hia ua tamata oia i te mafera ia 'na. Ua afaihia o 'na i te fare tapearaa e ua tuuhia te auri i nia i to 'na nau avae e to 'na a'î.—Genese 39:1-20; Salamo 105:17, 18.

E tītī Iosepha no tahito, area Nalia, no teie tau ia. E faarirohia te taata mai te tao'a te huru o ta oe e nehenehe e hoo mai, eita te mau ona e haapao a'e i te taata, i to ratou noa râ pute. E ere tera peu no teie nei.

E IMIRAA MONI HOONA

O te aroraa i rotopu i te mau nunaa te ravea ohie roa 'e ia noaa mai te tītī. I muri a'e e rave rahi aroraa i Kanaana, ua parauhia ua haru te arii Aiphiti o Thoutmôsis 90 000 taata. Ua faariro to Aiphiti ia ratou ei tītī no te mau ohipa heruraa, paturaa hiero



E mirioni o te faatītī-noa-hia ra

e te hamaniraa i te mau taheraa pape i roto i te mau faaapu.

I muri a'e i te tama'i e noaa rahi ai te tītī i te mau fenua faaterehia e Roma. I te tahi taime, no tera noa tumu ratou e faatupu ai i te tama'i. I te senekele matamua, fatata e tītī te afaraa o te huiraaatira i Roma. Mea haavī roa te mau fatu no Aiphiti e no Roma. No te mau tītī o te rave i te ohipa heruraa i Roma, e pohe te rahiraa i te 30raa o to ratou matahiti.

Aita te tupuraa i maitai mai. I 1501 e tae atu 1900, ua riro te hooraa i te tītī ei imiraa moni hoona roa 'e i te mau fenua Afirika e Marite no apatoerau e apatoa. Te haapapu ra te tahi faatiaraa no ō mai i te Taatiraa o te mau Nunaa amui no te haapiiraa, te ihi e te ta'ere. 'E au ra 25 e tae atu 30 mirioni tane, vahine e tamarii o tei haruhia e tei hoohia.' Ehia tausani tei pohe i te roaraa o tera mau tere na te moana Ataranitita. O Olaudah te tahi o ratou o tei ora mai, te faatia ra o 'na: "E faarookhia te mau vahine ia auê, oia atoa te uuru o te feia o te fatata i te pohe. Mea riarua mau, eita e noaa ia faataa."

E ere tera i te tupuraa peapea mau no tahito noa. Ia au i te Taatiraa o te mau Nunaa amui no te ohipa, te faatītī-noa-hia ra tau 21 mirioni tane, vahine

e tamarii tae roa mai i teie mahana. E faaravehia ratou i te ohipa e te moni haihai roa aore ra eita roa 'tu e aufauhia. I teie tau, te faatītīhia nei te taata i roto i te mau vahi heruraa ofai, hamaniraa ahu, hamaniraa ofai araea, fare taiataraa e te nohoraa o te taata. Noa 'tu e faautua te ture i te reira, te rahi noa 'tura tera hoho'a faatītīraa.

TE TIAMĀRAA

No te hamani-ino-raa ta ratou i faaruru, e rave rahi tītī o tei titau i te tiamāraa. I 100 hou te Mesia, ua faatupu te aito Spartacus e 100 000 tītī i te tahi orureraa hau i te faatereraa Roma, aita rā te reira i manu'ia. I 1791, ua tia mai te mau tītī o te motu Hispaniola no te patoi i to ratou fatu. I faaoromai na te mau tītī o te rave i te ohipa i roto i te mau faaapuraa tō i te hamani-ino-raa ino mau. E 13 matahiti te maoro o tera orureraa hau e ua hope te reira i 1804, te matahiti i noaa mai ai te tiamāraa i te nunaa no Haïti.

O te tiamāraa o te mau Iseraela mai Aiphiti mai te tiamāraa faahiahia roa 'e. E toru mirioni tei tiamā mai e ua hinaaro mau ratou i te reira. Te faaite ra hoi te Bibilia, "te mau ohipa atoa ta ratou e rave ra, i rave ia ma te hamani-ino-hia mai." (Exodo 1:11-14) Ua



Ua ora mai i te tahi atu hoho'a faatitiraa

E tītī atoa Alonso na mua 'e, e ere rā mai te mau tupuraa o tei faahitihia 'tu. I to 'na taurearearaa, e piti hoho'a raau taero paari mau o te tapea ra ia 'na ei tītī. Te faatia ra Alonso: "Ia pee ta 'u raau taero, e haere au e eiā e ua riro atoa ei taata hoo raau taero. Ua haere au i roto e maha pu o te tauturu ia faaea i tera peu, aita rā i manu'a. I te pae hopea, ua haruhia vau e te mutoi e ua mau vau i te fare tapearaa e maha matahiti."

E 30 matahiti te maoro to 'na riroraa ei tītī na te raau taero. I muri a'e rā, ua haamata oia i te haapii i te Bibilia

na muri i te mau Ite no Iehova. Ua putapū roa to 'na aau i te poroi a te Bibilia e ua faaoti papu atura ia faaea i te rave i te raau taero. Te na ô ra o 'na: "E ere i te mea ohie i tera rahiraa matahiti. Maoti rā te tauturu a Iehova, ua upootia mai au."—Salamo 55:22.

Te na ô faahou ra Alonso: "E oaoa iti rahi to ta 'u vahine no te mea ua tau'i au. E mauruuru rahi mau to 'u ia Iehova, na 'na i faaora mai ia 'u i te e'a o te aratai i to 'u iho pohe. Ahiri aita o 'na i tauturu mai, e tītī noa ā vau i teie mahana. Aore ra, ua pohe paha."

faaue atoa te tahi arii no Aiphiti ia haapohe i te mau tamarii ia ore te nunaa Iseraela ia rahi noa mai.—Exodo 1:8-22.

Mea taa ê te tiamāraa o te mau Iseraela i te mau hamani-ino-raa i Aiphiti no te mea o te Atua to muri mai i te reira. Ua parau oia ia Mose: "Ua ite hoi au i to ratou oto; e i haere mai nei au i raro nei e faaora ia ratou." (Exodo 3:7, 8) Tae roa mai i teie mahana, no reira te mau ati Iuda na te ao e faatupu ai i te oroa Pasa i te mau matahiti atoa.—Exodo 12:14.

E FAAORE-ROA-HIA TE FAATĪTĪRAA

Te parau ra te Bibilia: "Aita hoi e vahi hapa [aore ra parau-tia ore] i to tatou Atua ia Iehova." Aita te Atua i tau'i. (Paraleipomeno 2, 19:7; Malaki 3:6) Ua tonono mai oia ia Iesu no te "poro haere i te ora no te tītī . . . e ei tuu hoi i te feia i paruparu." (Luka 4:18) Ua ore anei te mau faatitiraa atoa? Aita, ua tonohia mai hoi Iesu no te faatiamā mai i te taata i te hara e te pohe. Ua parau Iesu i muri a'e: "Na te parau mau outou e faatiamā." (Ioane 8:32) Tae roa mai i teie mahana, e faaora noa ā te parau mau ta Iesu i haapii i te taata mai roto mai e rave rahi tupuraa.—A hi'o i te tumu parau tarenihia "Ua ora mai i te tahi atu hoho'a faatitiraa."

Ua tauturu te Atua ia Iosepha e ia Nalia ia tiamā mai i te mau faatitiraa e rave rau. E nehenehe oe e ite i te aamu faahiahia o Iosepha i roto i te buka Bibilia Genese pene 39 e tae atu 41. Mea faahiahia atoa te hopearaa o te tupuraa o Nalia.

Ua faahepohia Nalia ia faarue i te tahi tuhaa fenua no Europa, horo atura oia i Paniora. I ô, ua farerei oia i te mau Ite no Iehova e ua haamata i te haapii i te Bibilia. Ua faaoti papu oia e faatitiaifaro i to 'na oraraa. Ua noaa ta 'na ohipa apī e te papu. I muri a'e, ua paraparau oia i to 'na fatu ohipa tahito ia faaiti i ta 'na moni e aufau i te mau ava'e atoa. I te tahi mahana, ua niuniu atu tera vahine no te faaore i te tarahu a Nalia e no te ani i te tatarahapa. Eaha hoi tei tupu? Ua haapii atoa tera vahine i te Bibilia na muri i te mau Ite no Iehova! Te na ô ra Nalia: "Mea faahiahia mau ia ite e nafea te parau mau ia faatiamā ia oe."

Ua mauui o Iehova i to 'na iteraa i te mau Iseraela ia hamani-ino-hia e to Aiphiti. Hoê ā huru to 'na i mua i te mau ohipa tia ore mai tera te huru i teie mahana. No te faaore roa i te mau huru faatitiraa atoa, e titauhia te hoê tauraa rahi. Te fafau ra te Atua na 'na e faatupu i te reira. Te na ô ra hoi oia: "Te tatari nei rā tatou i te ra'i apī e te fenua apī ta 'na i parau maira, i te vai-mau-raa o te parau-tia ra."—Petero 2, 3:13. ■

Te mau maitai ia horoa noa

Tei roto Alexandra i te tahi pereoo mataeinaa o tei tapeahia i te otia fenua e faataa ê ra i te Marite apatoerau e apatoa. Faaroo ihora o 'na i te tahi ia parau: "Nehenehe te pereoo mataeinaa e tere, tera râ taata Tinito, e faaea mai ia!" Pou a'era Alexandra no te ite eaha te tupu ra. Te tamata ra te tahi taata Tinito i te faataa i te mutoi otia fenua i te fifi ta 'na i farerei. Aita râ oia i ite maitai i te paraparau na roto i te reo Paniora. I te mea tei roto Alexandra i te tahi amuiraa reo Tinito a te mau Ite no Iehova, ua tia 'tu oia no te tauturu i tera taata.

Ua parau tera taata Tinito aita o 'na i ofati i te ture, tera râ ua eiâhia ta 'na parau mana e ta 'na moni. I te haamataraa, aita te mutoi i tiaturi. Ua mana'o roa atoa tei roto Alexandra i te tahi ohipa o te imi i te moni i nia i te tua o te feia no te tahi atu mau nunaa. I muri a'e râ, ua mârû mai oia e ua farii i te faataaraa a te taata Tinito. Ua faautuahia râ oia ia aufau i te tahi tino moni no te mea aita ta 'na parau mana i nia ia 'na. I te mea aita atoa ta 'na e moni, ua horoa Alexandra 20 tara Marite (2 000 tiahapa F CFP). No to 'na mauruuru rahi,



ua parau oia ia Alexandra e faaho'i atu o 'na hau atu i ta 'na i horoa. Ua faataa te vahine aita oia e titau ra i te moni hau, ua oaoa oia i te tauturu ia 'na no te mea no 'na, mea tia ia na reira. Ua horoa Alexandra i te tahi mau papai na tera taata e ua faaitoito ia 'na ia haapii i te Bibilia e te mau Ite no Iehova.

E ere anei i te mea putapû mau ia hamani maitai i te taata noa 'tu aita tatou i matau ia ratou? E ere te mau Ite no Iehova ana'e te na reira. E hamani maitai atoa hoi vetahi e haapaoraa ta ratou aore ra aita. Ua tauturu

a'ena anei oe i te taata ma te aau tae? Mea faufaa ia feruri i tera uiraa, ua parau hoi Iesu: "E mea maitai i te horoa 'tu i te rave mai." (Ohipa 20:35) Na roto i te tahi mau maimiraa, ua itehia atoa i te mau aivanaa e ea maitai to te taata horoa noa. E hi'opoa ana'e eaha te tumu.

"TE TAATA HOROA NOA"

Ua haapapuhia, e oaoa te taata ia horoa noa. Ua papai te apotolo Paulo, "o te taata horoa noa hoi ta te Atua e hinaaro." Te mana'o ra oia i te mau Kerisetiano o tei horoa noa i te mau ô no te tauturu i tei roto i te ati. (Korinetia 2, 8:4; 9:7) Ua hinaaro anei Paulo e parau, na te oaoa i turai ia ratou ia horoa? Aita, ua oaoa râ teie mau Kerisetiano **no te mea** ua horoa ratou.

Ia au atoa i te tahi hi'opoaraa, ia horoa te taata "e faaara te reira i te mau tuhaa o te roro o te faatupu i te oaoa, te huru maitai i nia i te taata e te tiaturi. No reira [te taata] e maitai ai i muri a'e." Ua faaite te tahi atu hi'opoaraa, "mea oaoa a'e te taata o tei horoa i te moni ia vetahi ê ia haamâu'a oia i te reira no 'na iho."

'Eita ta 'u e nehenehe e horoa no to 'u tupuraa.' Ua feruri ê na anei oe mai tera? Mea hape tera mana'o, e nehenehe hoi tatou paatoa e riro ei "taata horoa noa" a oaoa 'tu ai. Noa 'tu e tino moni haihai, o te aau tae te mea

faufaa, na te reira i turai ia horoa. Ua haponono te tahi Ite no Iehova i te hoê ô i te feia pia o teie vea e teie poroi: “I matau na vau i te horoa i te ô i te Piha a te Basileia noa ’tu e tino moni haihai. Mea rahi a’e râ ta Iehova i horoa mai i ta ’u i tuu atu. . . . Maururu i te vaihoraa mai ia ’u ia horoa i ta ’u ô, oaoa roa to ’u aau.”

E ere te moni ana’e ta tatou e nehenehe e horoa, te vai ra te tahi atu mau ravea.

E MAITAIHIA TO OE EA IA HOROA NOA

Te na ô ra te Bibilia: “O tei hamani maitai i to ’na varua [aore ra tino], e taata hamani maitai ia; o tei rave ino ra i to ’na iho tino ua hamani ino oia.” (Maseli 11:17) Mea horoa noa te feia maitatai, ua ineine hoi i te horoa i to ratou taima, puai, here e te vai ra ’tu â. E rave rau maitai ta ratou e fana’o ia faaite i te aau horoa noa mai tera. Te tahi hi’oraa, e haamaitai te reira i to ratou ea.

Ua ravehia te tahi maimiraa i rotopu i te feia o te horoa noa ia ratou no te tauturu ia vetahi ê. Ua itehia mea varavara a’e ratou i te ma’ihia, i te mauui i nia i te tino e te hepohepo. E ea maitai a’e to ratou. E haamaitai atoa te hoê aau horoa noa i te ea o te feia e ma’i tamau to ratou. Mai te ma’i o te haafifi i te mau uaua uira e te mootuaio, oia atoa tei



Ma te horoa noa,
o oe e o vetahi
ê atoa te oaoa

ma’ihia no te tiro tiro o te haaparuparu i te ravea parururaa o te tino o te taata. Ua ite-atoa-hia e iti mai te hepohepo o tei riro na ei feia inu ava na mua ’e ia hamani maitai ratou i te taata. E tauturu te reira ia ratou ia ore ia topa faahou i roto i te peu inu ava.

No te aha mai tera ’i? Te manahoia ra “e iti mai te mau manahoia iino ia aroha tatou i te taata,

ia horoa i te rima tauturu e ia hamani maitai.” Ma te horoa noa, e iti atoa mai te ahoaho e e mârû mai te ne’iraa toto. No te feia ua pohe te hoa faaipoipo, eita ratou e vai noa i roto i te hepohepo ia tauturu ratou ia vetahi ê.

Mea papu ia teie parau, e maitaihia oe ia horoa noa.

IA HOROA OE, E NA REIRA ATOA VETAHI Ê

Teie ta Iesu i faaitoito i ta ’na mau pipi: “E horoa, e e noaa hoi ta outou; e i te faito, e neneihia, e ueuehia, e manii noa ’tu, na te taata e ninii i roto i to outou ahu. O taua faito hoi ta outou e faito ra, o te faito-faahou-hia mai ia ta outou.” (Luka 6:38) Ia horoa oe, e maururu vetahi ê e e turai te reira ia ratou ia na reira atoa. E hinaaro atoa ratou ia ohipa e oe e faahoa ’tu.

Ua hi’opoa te mau aivanaa i te huru o te taata e ua tapao ratou “ia tamau te tahi i te hamani maitai, e turai te reira i te tahi atu ia na reira atoa. Ma te taio noa i te aamu o te faaite ra i tei ravehia ma te hamani maitai, e hinaaro vetahi ê e horoa noa.” Ia au i te tahi atu maimiraa, “i nia i te Internet, e nehenehe hoê e turai ahuru tiahapa aore ra hanere atu ia na reira atoa noa ’tu aita o ’na i matau aore ra i farerei a’enei i tera mau taata.” Te auaa, e nehenehe hoê ohipa ta te taata

horoa noa i rave e haaputapū e rave rahi taata. Eita anei oe e hinaaro e ora i te vahi e na reira te tahi e te tahi? Oia iā, e maitai rahi hoi te itehia ia tamau e rave rahi i te horoa noa.

A hi'o na i tei tupu i Floride i Marite. Ua hopoi te tahi pūpū Ite no Iehova i te rima tauturu i muri a'e i te tahi mata'i rorofai. A tia ai ia horoahia 'tu te mau tauihaa e tia ia tatai, ua tapao ratou ua ino roa te aua o te tahi taata tapiri e ua parau atu e tatai ratou i te reira. Tau taime i muri a'e, ua hapono te taata i tauturuhia i te tahi rata i te pu rahi a te mau Ite no Iehova. Ua papai oia: "Auê au i te mauruuru. No 'u, o tera mau taata te feia maitai roa 'e ta 'u i farerei a'enei." No to 'na mauruuru, ua hapono oia i te tahi ô horoa noa ia faaohipahia te reira no te ohipa ta 'na e pii, te ohipa faahiahia mau a te mau Ite no Iehova.

A PEE I TE HI'ORAA MAITAI ROA 'E

E ohipa faahiahia ta te mau aivanaa i ite atoa. Ua parauhia i roto i ta ratou hi'opoaraa, "e au ua hamanihia te taata e te hinaaro e tauturu ia vetahi ê. E haa hoi te tamarii no te tauturu ia vetahi ê hou o 'na a haapiihia 'i ia para-parau." Eaha te tumu? Te horoa ra te Bibilia i te pahonora, ua hamanihia te taata e te mau huru



Ma te horoa noa, e hinaaro vetahi ê ia ohipa e oe e faahoa 'tu

maitatai o te Atua.—Genese 1:27.

E Atua horoa noa o Iehova. Na 'na i horoa mai i te ora e te mau mea atoa o te faaoaoa ra ia tatou. (Ohipa 14:17; 17:26-28) E ere rā tera ana'e to 'na huru maitatai. E nehenehe oe e ite atu â no nia i to tatou Metua i te ra'i e ta 'na mau opuaraa i te here ma te haapii i te Bibilia. Te faaite atoa ra ta 'na Parau eaha ta te Atua i rave ia oaoa tatou e a

muri noa 'tu.* (Ioane 1, 4:9, 10) O te Atua ra o Iehova te tumu o te mau ô horoa noa e ua hamanihia oe ia au i to 'na huru. Ia pee oe i to 'na hi'oraa ma te horoa noa, e ere iā i te mea maere ia oaoa e ia fana'o oe i ta 'na farii maitai.—Hebera 13:16.

Te haamana'o ra oe ia Alexandra tei faahitihia i te omuaraa? Ua parau te tahi i roto i te pereoo mataeinaa eita ta Alexandra moni e faaho'ihia. Ua niuniu rā te taata ta 'na i tauturu i to 'na mau hoa o te faaea ra i te tahi oire e na reira 'tu ratou i te tere e ua faaho'ihia tera moni. Hau atu â, mai ta Alexandra i faaitoito atu, ua haamata oia i te haapii i te Bibilia. E toru ava'e i muri a'e, ua oaoa roa oia i te farerei i tera taata i te tahi rururaa a te mau Ite no Iehova na roto i te reo Tinito i Peru. No te faaite i to 'na mauruuru, ua titau manihini oia ia Alexandra e tei haere na muri ia 'na i te rururaa ia tamaa i roto i ta 'na fare tamaaraa.

E oaoa te noaa mai ia horoa e ia tauturu tatou ia vetahi ê. Hau roa 'tu â ua tauturu ana'e tatou i te taata ia haapii atu â no nia i te Tumu o te mau ô maitatai atoa, te Atua ra o Iehova! (Iakobo 1:17) Te ite ra anei oe i te mau maitai ia horoa noa? ■

* No te ite atu â, a hi'o i te buka *Eaha ta te Bibilia e haapii mau ra?* piahia e te mau Ite no Iehova. Te vai atoa ra i nia www.jw.org/ty. A pata i nia PIAHIA > BUKA E BUKA RAIRAI.

Te ora ra anei tatou i te “anotau hopea”?

E pahono anei oe:

- ▶ E
- ▶ Aita
- ▶ Peneia’e

Ta te Bibilia e parau ra

“E tupu te ati rahi i taua anotau hopea nei, ia ite mai oe.” (Timoteo 2, 3:1) Te haapapu ra te mau parau tohu e te mau ohipa e tupu ra, te ora nei tatou i te “anotau hopea.”

Eaha ’tu â ta te Bibilia e haapii mai?

- ▶ E roiro te mau tama’i, te pohe poia, te mau aueueraa fenua e te mau ma’i pee ei tapao faaite e te ora ra tatou i te anotau hopea. —Mataio 24:3, 7; Luka 21:11.
- ▶ I te anotau hopea, e faaite te taata i te hae-rea ino e eita atoa e hinaaro i te Atua. —Timoteo 2, 3:2-5.

Eaha te oraraa e tiai mai ra i te huitaata?

Ta vetahi e tiaturi ra:

la hope te anotau hopea, e haamouhia te fenua e te mau taata atoa. Te mana’o ra te tahi atu, e maitai mai te tupuraa o te ao.

Eaha to oe mana’o?

Ta te Bibilia e parau ra

“E parahi te feia parau-tia i nia i te fenua, e parahi tamau â ratou i reira.”

—Salamo 37:29.

Eaha ’tu â ta te Bibilia e haapii mai?

- ▶ la hope te anotau hopea, e haamouhia te feia iino atoa.—Ioane 1, 2:17.
- ▶ E faairohia te fenua ei paradaiso. —Isaia 35:1, 6.



O te paradaiso i nia i te fenua te tiai mai ra i te feia o te ora ’tu i te anotau hopea



A hapono mai na hoê buka
Eaha ta te Bibilia e haapii mau ra?

No te ite atu â no nia i te “anotau hopea,” a hi’o i te pene 9 o teie buka piahia e te mau lte no lehova.

Te vai atoa ra i nia www.jw.org/ty

REO _____

I’OA _____

VAHI NOHORAA _____

A hi’o i te api 2 no te papai mai



Mea tamoni ore ia rave mai i teie vea e tei matara ê na

Bibilia na roto hau atu 130 reo

A hi’o i nia www.jw.org/ty aore ra a faaohipa i teie hoho’a

